

ՀԻՆ ՔՆԱՐ

Տաղ ի սոչրքն Յովհանն Ոսկերերան .

Այսօր ի քո փառս պարծի եկեղեցի, Ոսկերերան Յոհան .
Քահանայապետ սուրբ անմեղ անցեալ ընդ երկինս ի սրովբէիցըդ պարս :
Ո՛վ դետ յորդառատ քաղցրանոյշ քեւ զմայլեցաւ ընդհանրական աշխարհս :
Բարձրաձայն կոչող զմեղաւորս ի Քրիստոսի եկեղեցւոյ ի դոգ .
Կանգնող անկելոց, սէր եւ յոյս յուսահատելոց ի խաւարէ մեղաց :
Զգիրկսըդ լայնեցեր ժողովեալ զվիրաւորեալսն ի բանսարկուն նետից .
Դու երաշխաւոր մըտեր ամենեցուն որ առ Քրիստոս զիմեն :
Զհոգին Պօղոսի առեր կըրկին ի քեզ Եղիսէոսըդ մեծ :
Զքէն միշտ հոգանան աղքատք ով կերակրիչ ամենեցուն նոցա .
Զոմանըս բանիւ զայլս նոքօք սփոփեցեր ի յաշխարհի ի կեանս :
Մեծդ Ոսկերերան քո սիրովդ ոչ յագենան տիեզերաց ազինք :
Հայր մանկանցս գըլթած որ մանրեալ զբանըս սուրբ գրոց ի քո կոկորդըդ սուրբ
Արտաքըս բերեր ախորժ եւ կերակուր ըզնա տղայոցս ետուր :
Քեւ պարծի այսօր, սուրբ հովիւ Կոստանդնուպօլսի, եկեղեցի քո մեծ .
Նոր գրեզ առաքեալ կոչէ եւ գրո ըստինսըդ մանկաբար ձըգէ :
Ծառայ Քրիստոսի հաւատարիմ որ գրո քանքարսն աճեցուցեր կըրկին ,
Ուստի եւ եղեր իշխան տասն քաղաքի երկնաւորաց զօրաց :
Սուրբըդ Յոհաննէս, արարող, ուսուցանող զաւետարանն տեառն :
Մեծ յարքայութեանդ երկնից ելեալ եղեր ըստ Քրիստոսի խոստմանցն :
Յիշեա աղաչեմք ըզքեզ ի քո մաղթանս աստուածութեանդ հանդէպ :
Հուպ Երրորդութեանդ ի պար քերովբէ յոր դասեցար այսօր ,
Մի՛ հայր մուսնար զողորմած քաղցր քո կամս ի մեղաւորաց վերայ ,
Այլ լեր բարեխօս ներել մեր յանցանացն 'ի վըշտալից կենցաղս :
Զի յայդ առաքաստդ ուր ես , լիցուք արժանի փառաւորել զՔրիստոս
Ընդ Հօր և Հոգւոյն յայժմուս և յաւիտեանս յաւիտենից ամէն :

